

Na osnovu člana 4.8. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, broj 7/02) i čl. 6. i 7. Pravilnika o tarifnom postupku (“Službeni glasnik BiH”, broj 44/05), Državna regulatorna komisija za električnu energiju, na sjednici održanoj 2. septembra 2010. godine, donijela je

## **ODLUKU**

### **O DOPUNI ODLUKE O ODREĐIVANJU TARIFA ZA POMOĆNE USLUGE**

#### **Član 1.**

U članu 9. Odluke o određivanju tarifa za pomoćne usluge (“Službeni glasnik BiH”, broj 35/10) dodaje se novi stav (3) koji glasi:

“(3) U slučaju da je obim raspoložive regulacije manji od obima potrebne regulacije, mjesečni finansijski iznosi koje plaćaju subjekti iz stava (2) ovog člana, umanjuju se srazmjerno odnosu obima raspoložive i potrebne regulacije.”

#### **Član 2.**

Ova odluka stupa na snagu danom donošenja, primjenjuje se od 1. maja 2010. godine i bit će objavljena u “Službenom glasniku BiH” i službenim glasilima entiteta i Brčko distrikta Bosne i Hercegovine.

#### **Obrazloženje**

U okviru tarifnog postupka za određivanje tarifa za pomoćne usluge, u nominacijama koje su dostavljene od strane proizvođača za usluge sekundarne i tercijarne regulacije za 2010. godinu, ponuđeni iznos bio je veći od potrebnog, tako da je donošenjem *Odluke o određivanju tarifa za pomoćne usluge* („Službeni glasnik BiH“, broj 35/10 – u daljem tekstu: Odluka) reduciran do nivoa potrebnog. Uprkos ovako izraženom raspoloženju proizvođača u fazi nominacija, već u prvoj polovini 2010. godine pokazalo se da u praksi ne postoji dovoljan obim raspoložive regulacije. Ispostavilo se da proizvođači ne poštuju obaveze koje su u pogledu obima nominiranih kapaciteta bili sami spremni preuzeti, kao ni obaveze u pogledu obezbjeđivanja potrebnog obima snage za usluge sekundarne i tercijarne regulacije koji im je čl. 3. st. 2. i čl. 4. st. 3. svoje Odluke propisao DERK. Ovo je naročito izraženo kod sekundarne regulacije gdje je obim pruženih usluga umanjen za više od 50%.

Iako u sadašnjem modelu *Tržišnih pravila* postoje odredbe prema kojima se umanjuje naknada proizvođačima u slučaju nepoštovanja propisanih obaveza kod pružanja pomoćnih usluga, ipak, kada su u pitanju krajnji kupci, a naročito kvalificirani kupci, DERK je uočio da je postojeći mehanizam neelastičan, da ne uvažava principe pravičnosti i ne doprinosi pravednoj raspodjeli troškova kod alokacije tarifa.

Uvažavajući ove principe, DERK je i ovog puta ostao na stanovištu da zbog znatnog reduciranja obima isporučenih usluga od strane proizvođača kvalificirani kupci i elektrodistribucija Brčko distrikta ne treba da plaćaju ove usluge u punom obimu. Ovim kupcima zbog karaktera tarife koju plaćaju za pomoćne usluge, nije bilo moguće uzeti u obzir smanjeni obim pomoćnih usluga koje su proizvođači pružali, odnosno koje su kupci konzumirali.

Dopunom Odluke o određivanju tarifa za pomoćne usluge, DERK ne mijenja suštinu i smisao postojeće Odluke, već samo osigurava jasan i nedvosmislen pristup u njenoj primjeni, čiji je cilj da se postigne preciznija raspodjela troškova, u kojoj će svaki kupac plaćati uslugu koju je zaista i dobio. Dosljedno izloženom cilju, u okvirima svojih regulatornih ovlaštenja i obaveza, DERK štiti ravnopravan i pravedan tretman kupaca i završnom odredbom dopune Odluke

obavezuje na izvođenje odgovarajućeg preračuna troškova koje su kupci imali od 1. maja ove godine od kada se Odluka i počela primjenjivati.

Najzad, DERK očekuje da dopuna Odluke u određenoj mjeri korisno doprinese i postizanju potrebne izbalansiranosti u pružanju pomoćnih usluga u elektroenergetskom sistemu te većoj regularnosti tržišta ovih usluga, odvrćajući korisnike sistema od mogućih manipulacija i nedozvoljenih ponašanja.

Broj: 04-28-5-348-92/09

2. septembra 2010. godine

Tuzla

Predsjedavajući Komisije

Mirsad Salkić